

Jaorverslag VVDS 2014-2015

2014-2015 was ut jaor van:

- Prins Daan d'n Urste, mit zien prinses Marloes,
- van Jeugdprins Mike d'n Urste, Jeugdvorstin Amber en Jeugdnar Roel
- Ut jaor van nog *iiiiiiiiieëne* drinke
- Ut jaor van de twedde edisie van Expeditie Mök, mar de urste edisie van ut Expeditie Mökkebal
- Ut jaor de prins en "nummerke het gemakt"
- Ut jaor van live entertainment ien den terp mit klassiekers as "Vruuger an de gokkast", "Juffrouw ik moet plassen" en "D'r het en doif op main vurroit geskete"
- Ut jaor van nog mar *iiiiiiiiieëne* drinke
- Ut jaor van "of ge nou van roëje of gruune traktors halt, carnaval viere we dit jaor mit jong en âld"
- Ut jaor van: "As ge ow vur aswoensdag owwe baar het geschore hedde thuis niks te vertelle"
- Ut jaor van wer unne fantastische vastelaovend

Ut bestuur bestoond uut:

- Vurzitter Emiel Evers
- Vorst Jop Loonen
- Penningmèster Robert Steeghs
- Sik Rob Kunkeler (den steeds mier plat kan schriev)
- En de bestuursleje . . . Freek Smulders - Martijn Drabbels - Han van de Sande en John Voermans

De Raod van Elluf bestoond dit jaor uut:

Stef Claessens - Tom Loonen - Pascal Classens - Freek Smulders - Vincent Verstappen, Fred Peeters - Roel Steeghs, Marc Steeghs, Rowan Wijnhoven, Paul Geurts en Sander (Wat-SEP) Peeters

11-11

Uiteraard begos ut seizoen tradisiegetrouw op 11-11. Dit seizoen viel dat op unne dinsdag. Behalve ut opene van ut seizoen mit toenmalig Prins Erik d'n Twedde was d'r dit jaor nog un extra gebeurtenis: De neje vorst wier dizze aovend bekend gemakt. Toen iederiën goed en wel binne was en iederiën es roond gekeke haaj wie d'r ut mèst zenuwèchtig was, ging ozze kersverse vurzitter Emiel as ziende Koos Oster an de slag mit un spelleke "Wie van de Drie??". De 3 kandidate ware Jop Loone, Freek Smulders en John Voermans. Nao en aantal kritische vraoge gesteld te hebbe wier de echte vorst gevraagd zich bekend te make. De drie kandidate ginge dur de kneje, en degene den ut urst wer opstond um de vorstemuts op te zette was Jop Loonen. Nao unne polonaise en zien urste woorde as vorst was ut metiën tied um ut seizoen te opene. Zonder microfoon, dus ut was gelijk un test vur ut stemvolume van de neje vorst.

Iënmaal terug binne was ut woord an de vorsteraod die ok op bezuuk ware. Ze wenste Vorst Jop succes mit zien carrière, en Emiel wier ok nog efkes ien ut zönneke gezet. Hej ontving de groot-orde van de vorsteraod vur zien beweze dienste as vorst.

Wat latter op den aovend wiere ok nog de neje raodsleje vurgesteld. Rowan, Sander en Paul wiere iën vur iën vraoge gesteld over hun wèrk, hobby's en vriendinne. Conclusie: Rowan zurregt vur ventilaterkes ien de mutse, Paul zurregt dat ze volautomatisch werke en Sander zurregt vur ut personiël dat ze ien göt bouwe.

15-11: Vorsteraodsbal

De zaoterdag dornao was ut wer tied vur ut jaorlukse vorsteraodsbal. Dit jaor was ut ien Holtus-Smakt bej de Keavers. Die han 5x11 jubileum, en daorvur han ze spesjaal un tent gezet. En nie de minste. As unne vorst klaar was mit praote was ut geluid van hun urste woorde net achter ien de tent angekomme. Gelukkig honge der halleverwege de tent scherme waordur iederiën alles kos zien.

Vorst Jop was as viefde an de beurt. Zien verhaal viel ien goeie aarde, misschien ok wel umdat Câssele nou ok wer es de wiend van veur kreeg. Câssele kos dit warschienluk nie zo goed verwerreke, dus hebbe ze toen ze naor huus ginge de bluumpkes buute gezet, of eigeluk binne ien de bus.

16-11: Receptie Keavers

Daags daornao ware we uutgenuëdigd vur en jubileumreceptie bej de keavers. Ok Câssele kwaam de bluumpkes wer terugbrenge nao en kwoj tillefoontje van de vurzitter van de Keavers.

We wiere uutdrukkeluk verzocht um nie lang te praote, zoëdat ze zo snel meugeluk kosse gaon fiëste. Dat ging prima, totdat de carnavalsverieniging uut Vortem op ut podium kwaam. Naodat zo'n bitje iederiën op ut podium haaj gepraot, gedanst of muziek haaj gemakt, ware we un hallef uur verder. Mar goed dat we ut nie te lang mooge make want normaal gesproke zulle ze dan ut podium wel anderhallef uur afhure.

We hebbe der daor un paar gedronke, en al mit al wer unne vermakeluke middag.

28-12: Prinsraoje

Uiteraard moog den dag iederiën wer en gokje wage dur de lieste ien te vulle. As ge keurig netjes ow liest uut ut krèntje hat iengevuld, en nie afwaachte tot iemes ow an de deur un liest kumt brenge, dan hadde ok nog mier kans, want der ware un paar name weggelaote ien de urste versie.

Zondag 4 jannewarie: Prins aftreje en Prinseproclamasie

De urste zondag van ut jaor is vur veul meense ien van de spannendste daag van de vastelaovend. Uiteraard begosse we ien d'n Terp mit ut aftreje van Prins Erik en zien Prinses Berna. Ze kregen en moje proclamasie gemakt dur den hofschilder en Erik moog nog iëne kier as prins ut woord neme. Toen ze wer gewoën Erik en Berna ware kwaam uiteraard de APK um Erik op te neme bej hun club, zoëas die kèls altied moj doen. Ok was d'r nog un liedje gemakt, spesjaal geschreve dur de 3 vurgaonde ex-prinse. Vur degene die de tekst nie hebbe kunne huure is dees op te vraoge bej Ex-prins Erik, aangezien den de tekst natuurluk netjes iengeliest en bewaard het.

Toen mit zien alle naor de Liende, waar um 11 over 3 ut uitkomme van de prins begos. De schuufdeure ginge ope, en daor was un echte Oelderse sporthal te zien. Ut idee was um te kieke of un sporthal ien de Liende meugeluk was zonder de huidige activiteite ien de wèg te zitte. Vorst Jop haaj wat meense uutgenuëdigd um dit uut te probiere. Mark Steeghs, Zanders en Van de Sande, John "Trappatoni" Voermans en Paul "Glasweb" Geurts en zellufs de ennige echte Toppers passierde de revue, en ondertusse wiere die ien de PP-Room an de tând gevuld dur JL, den wel verrekke veul leek op iemes anders.

Toen dat allemaol uutgeprobiert en getest was, was ut natuurluk ut belangeriekste dat d'r ok nog vastelaovend gevierd kos werre. De 11 regels vollegde en daor kwaam Prins Daan d'n Urste mit zien Prinses Marloes angevloge vanuut de ziekant, en ok bejna wer an de andere kant van ut podium af. Toen was ut tied vur ziene urste speech, en daorvur haaj hej en extra groët viltje geregeld.

Dornao was ut tied vur ut uitkomme van de Jeugdprins, mar vurdat den uut kos komme mosse alle kiender un paar opdrachte vervulle. Naodat ze gespronge, gezonge en polonaise geloëpe han

vollegde ok hier de 11 regels, en daar stoond ut neje jeugdtrio: Prins Mike d'n Urste, Jeugdvorstin Amber en Jeugdnar Roel. Alledrie moge ze speeche en dornao ien unne groëte polonaise op de nek. Ut fiëst ging nog effe dur, roond 8 uur nog efkes naor un vrejwel lege soos, en ut wier 's aoves afgeslote ien d'n Terp, mar nie vurdat we nog un eike han gegète bej ut kersverse prinsepaar.

Ok hebbe we vur ut urst de Liende 's aoves al opgeruumd aangezien d'r smerges genne tied vur was, en ok dat verliep op röllekes.

10 jannewarie: Âld Wieverbal

Ut fiëst der fiëste viel dit jaor ien ut weekend naor ut prins uutkomme. Metiën un kans vur Prins Daan um te wenne an ziene wèrme mantel. Dit jaor wiere koste noch moeite gespaard, want de Band ApartY stond wer op de bühne, mit alles derop en deran: Veul licht, veul geluid, en net zoveul roëk ien de zaal as ut aggregaat van Ruudje van Diek dat buute stoond te blaake.

Un foto zet mier as duuzend woorde, dus gèr ollie andacht vur de moje sfeerimpressie van ut ald wieverbal op den beamer.

Naoderhand ginge we eier ète bej Paul, en daar wiere de eier mit traykes en al gebakke. Ienmiddels is de brandlucht wer weg, aldus Paul.

17 jannewarie: Prinsebal Luëne

Umdat prins Daan de prins van Luëne goed kende, won ze nog same iëne kier op de foto vurdat Prins Bart af mos treje. Hierum, en umdat ut toch wer en goeie reje is um uut te gaon, zien we naor Luëne gewist waar de neje prins uitkwaam. Ok kosse we daar es kieke hoe ze dat daar duun, misschien dat we der nog wat van kosse liere. Conclusie: Wej hebbe geliend dat Luëne bèter bej os haaj kunne komme kieke. Toen wej de knöllekes wer gaar han ginge we wer terug naor ut Spurriemökkeland.

23 en 24 jannewarie: De bonte aovende

Vur ut twedde jaor op rej midde ien ut seizoen: De Bonte Aovende. Ok dit jaor alliën den afsluuter den nie uut Oeldere kwaam.

De opening haaj dit jaor un internationaal tintje. Toen iederiën wis wie de frontseater, the frost, the pennymaster, the reet from 11 en sik was, kos ut programma beginne.

As urste ware daar de jonge van de Showdrums Oeldere die wat plaatwèrk van unne auto recht won timmere. Gelukkig dat ze dat krek op ut goeie ritme dun, want den auto zaag d'r naoderhand nie mer uut.

Dornao was ut de beurt an Oeldere Drèjt Durrrrr. Dees here han vurrig jaor ok al mitgedaon, en dit jaor han ze un hiël wat korter stuk umdat d'r genne beamer angeslote hoefde te werre.

Dennis, Ruud, William en Han, bedankt, ok names de toniëlmèsters!

Toen was ut tied vur de dansgroep. 3 vrollie kosse dat hiël goed, te wiëte: Lonne Loonen, Abigail Fleurkens en Danique Thijssen.

Ok de APK was wer van de partij, en die kels wiëte iederiën ieder jaor wer te verrasse mit un moj stuk, en dit jaor hebbe ze spesjaal de mèst stabiele persoënlukhede opgetrommeld um un stukske te zinge. De meense op de urste rij zien ienmiddels ok wer bekomme van de schrik. Moj gedaon dur Ron, Ton en Pieter.

Dornao kwame d'r twië kels op ut podium die daar wel dukker hebbe gestaon. Hun stuk hiette Buurman en Buurman. De iëne buurman droeg un te kort shirt, trainingsboks en sportschoen, en den andere buurman droeg 'm ... Rechts..... Respectieveluk Emiel en John, Theoreties hedde gillie dat moj... eeh gèr gedaon.

We begosse dornao 17 minute te vroeg mit de pauze, mar as compensatie kóste dit jaor kieze tusse witte of bruune brödjes.

Naor de pauze was Jos Loone an de beurt as Pierre Culinair, en mit zien mojje verhaal as cateraar bakte hej der zeker *wel* wat van. Hartstikke moj dat we wer unne echte Oelderse buutreedner hebbe gehad. Moj gedaon!

Nao Jos vollegde twië kels die eigeluk hôst ieder jaor mitduun. Ut was al un paar jaor geleje dat ze as de Mutse op ut podium stoonde, en ze ware dan ok net terug van unne wereldreis. Mit hun verhale kregge ze wederom de lachers op de hand, en ok dit was wer en geslaagde act. Marco en Peter, ok dit jaor ware gillie wer gewoën goed.

As afsluuter han we dit jaor os jonges geboekt, en die vertelde un moj verhaal ovver dat ze bej de fanfaar zitte, mar eigeluk vurnameluk ien beschonke toestand an ut träote ware, umdat ze mèstal ien ien de kroeg zichzelluf nie kosse beheerse. Mit dit verhaal kwaam dees edisie van de bonte aovend ten einde, mar ut jaor van "nog iiiiiiiiiiiieëne drinke" was gebore.

Zondag 25 jannewarie....

...wier de wedstrijd der wedstrijde gespuld. Korfbal SVOC'01, ut Oelderse Urst, tigge SV Oxalis, ut team waar Prinses Marloes bej spult. Mit en delegasie zien we daar wiste kiekke, en umdat wej un beetje neutraal mosse zien hebbe we ien ut mitte op de tribune gezete en vur iederiën gejuicht. Toen Prins Daan derachter kwaam dat ze dees sport nie mit un racket dun hebbe we de regels mar efkes gegoogled. Uuteindeluk was SVOC mit 17 tigge 4 toch te stèrk en ginge ze mit de winst naor huus. Prins Daan het nog en potje strafworpe gedaon, en hej het zellufs geliek gespuld. Tigge un megje van 8.

Dornao zien we op bezuuk gewist ien ut Tuuteriek, en vur degene die nie wiëte wat dat is, dat is Hègelsum. Umdat os prinses daar zoëas bekend vanaf kumt zien we op de receptie gewist van Preeeeeens Ruud Zanders. Inderdaad, daar wel...

Ozze prins het daar un woordje gedaon en toen os prinses wer efkes bejgebuurt haaj ginge we ok wer huuswaarts.

Vrejdag 30 jannewarie: Circus Mök

We zien ok naor Circus Mök gewist. Daar won ze os naodoen en alliën "eige dörpse" acts op ut podium hale. Misschien dat ze die beslissing volgend jaor motte heroverwege, aangezien de bèste act uut Ysselsteyn kwaam. Ut fiëst dornao was dan wel wer gezellig. An ut end van den aovend het un raadslid ut stökske aovergenome van prins Daan. Terug ien Oeldere, nog iiiiiiieëne drinke ien den Terp.

Zaoterdag 31 jannewarie: Krantverkoëp

Ok dit jaor was der wer unne schonne carnavalskrant gemakt. Dizze wier uutgereikt an prins Daan, mar hej mos wel urst wat traktergeluide goed raoje, en dan zeuj hej zien stökske misschien ok wel wer terug kriege, nameluk ziene scepter. Hej het twië van de drie herkend, en daarom wier de krant uutgereikt an de prins en de jeugdprins, en ze kregge ok nog de iengelieste vurkant derbej.

Metiën nao de krantverkoëp was ut wer tied vur de twedde edisie van Expeditie Mök! Dit jaor was zellufs de Peel en Maas derbej um de aftrap bej te wone. Iederiën haaj zien mökkezuukmobiël mitgenome: Jeep, Unimog, Trakter, Dodge, Quads, Verreiker en un bolle-oogst-loëfklap-geval-ding van de firma Loone. Tradisiegetrouw wier der ok wer carbid afgeschote. Ut aftelle van 11 naor 0 ging prima, alliën den bal kos nie telle dus sprong d'r alvast unne kier of 8 uut vurdat de 0 bereikt was. Mar ut kos èvegoed van start gaon, en ut was wer twië wèke spannend. Vurral umdat ozze eige prins Daan nog angehâlde wier dur de pliesie wegges stroëperij. Gelukkig was de organisatie nie te flauw en hebbe ze efkes uutleg gegève, en kosse ze wer verder.

's Aoves zien we d'r iiiiiëne wiste drinke op ut ald wieverbal a.k.a. bonte aovend a.k.a. boerebrulleftsproclamasie ien ut keieschietersriek. Vur de leek, da's Geijstere. Daar was bijna net zo'n dure band as wej op ut ald wieverbal han staon. We hebbe d'r un moj fiëst van gemakt, en gelukkig was de entree vur os ok gratis. Terug ien Oeldere, toch mar wer nog iiiiiiieëne drinke ien d'n Terp.

Zondag 1 fibrewarie: Prinsereceptie

We ware eigeluk misschien nog nie gans uutgerust en toen was ut alwer tied vur de jaorlukse prinsereceptie. En ut was wer gezellig druk, mit veul veriëninge: Rooy, Câssele, Hègelsum en Geijstere ware der, en die lèste hebbe as compensatie ok gen entree hoeve te betale. Ok de dansemarietjes van Swolge hebbe spesjaal vur Jeugdprins Mike en dansje gedaon. Ut was unne hiële gezellige middag waar we der iets mier as iiiiiiëne hebbe gedronke.

Helaas bleek ok dat die Câsselse nie wiezer ware geworre toen we buute kwaame en os moje vlagge weg ware. Wej gaon der vanuut dat ze os vlag veul mojjer viende dan die van hun eige. Logisch... Nao de reseptie, wederom ien d'n Terp, nog iiiiiiëne drinke....

Vrejdag 6 fibrewarie: Ald wieverbal Câssele

Umdat zej zo vriendeluk ware gewist um bej os op de receptie te komme, ginge wej ok naor ut ald wieverbal ien Câssele. Umdat niemes zich anbooj um te reje stelde Vorst Jop vur um mit de fffffff.....mit de fffffff..... dat ding op 2 wile te gaon. En toch moj, zo gauw as ge ut "F-woord" gebruikt, bieje zich spontaan meense an um te reje. Zellufs 2 kier op en neer as dat mos. We han ienèns zoveul plats aover dat de hiële jeugdraod nog mit gekund haaj.

Mar goed, wej dus naor Câssele. Dat duun wej gèr, want hoe dukker wej daar komme um de kas te spekke hoe langer un eventuele aovername van de Schanseknuppel dur de Spurriemök kan werre uutgesteld, want daar zit niemes op te waachte. Uiteraard honge daar wel os vlagge tentoëngesteld, en Vorst Jop het de rèkening vur twië vlagge plus stök afgegève bej Vorst Dirk. Uiteraard zoot der wel ien wèk "Ik haaj der mit mien klauwe vanaf motte blieve en ik gèf ze toch mar trug"-garantie op, en zoë gezeet zoë gedaon, wej ginge an ut end van den aovend wer mit os vlagge naor huus.

Zaoterdag 7 fibrewarie: Oelderse Kôst

Dit jaor splinternej: Oelderse kôst. De JVV-aovend was helaas nie mer lèvesvatbaar, mar same mit d'n Terp, de KBO en oszellef hebbe we unne neje middag ien ut lève geroepe, en an de reacties te huure was ut vur herhaling vatbaar. Thej de Rijck, Will Peters en Piet Drabbels hebbe opgetreje, d'r was soep mit nie teveul grei derien. Volgend jaor kriegt ut zeker un vervolleg, en dan misschien zellufs wél mit kleuntjessemik mit echte botter.

Zondag 8 fibrewarie han we us unne kier niks...

Donderdag 12 fibrewarie: SJMO

Ok dit jaor zien we wer bej de SJMO op bezuuk meuge komme, en ut leek d'r drukker en gezelliger as vurrig jaor.

Vrejdag 13 fibrewarie: Scholcarnaval

Op vrejdag wier op schol de vakantie iengeluid mit de schóloptocht en de schólcarnaval. Op dizze middag wier un stuk minder gepraot as anders. Misschien dat ut iets te make haaj mit dat mèster Ramses ziek was en ze Hans Hebben hebbe gevraag of hej ut woord woj hebbe. Unne mojje optocht, un aantal optrejes, al mit al un gezellig fiëstje.

's Aoves was ut tied vur ut ziekebezuuk, en zien we urst efkes bej Nel Zanders nève gewist. Dornao bej Sidney van der Aa, die was net uut ut ziekehuus, en mos alwer mit ut gezin bej ur oma overnaachte umdat ur opa ien ut ziekenhuus laag. En bezuukske van de prins was un welkome afwisseling en we wiere dan ok harteluk ontvange.

Zaoterdag 14 fibrewarie: Carnaval

Toen alle raodsleje hun geliefde un ontbijt op bed han gebrocht vur valentijnsdag, ginge ze zellef ontbijte ien de soos. Daor ware de eier nog zwarter as vurrig jaor, mar dat miek os eigeluk niks uut.

Dornao was ut vur de raad opbouwe geblaoze, oftewel ballonne, mar de Vorst en ut prinsepaar ginge op bezuuk bej ut klènste mökske. Helaas haaj de moeder wel tiet, mar nie vur os.

's Middags was de installasie op ut gemèntehuus annex schouwburg waar vur ut twedde jaor iedere prins unne hóltere sleutel van zien dörp het gekrege. Dat dizze vurrig jaor iengeleverd mos werre kwame ze vrej laat mit. Mar efkes van den andere kant bekeke, ien rooj zien zoveul buëm gekapt dat ze daor 2 arke, 6 jetskies en 25 blokhutte van han kunne bouwe, mar ze zien wel zo toegenèjd dat wej unne 3mm dik multiplex dur de sociale werkplats uitgefiguurzaagde sleutel terug motte gève. Mar ok dit is wer goedgekomme.

Vervolleges was ut iemes zien idee um naor de Roetsj te gaon. Dat hebbe we gewiëte. De vertraoging van de schouwburg naor de groëte mèrt was ongevèr anderhallef uur. Iënmaal daor angekomme hebbe we der daor nog iiiiiiiiiiieëne gedronke. En chips, nootjes, chocolaat, kuukskes en grei gegète, nie persé van mekaar gescheide.

Um un uur of 5 wer naor huus um hiël efkes te ète en op de baank te ligge.

Um 7 uur was de mis. Ut was minder druk as andere jaore. Hier zurregde Will Peters ok wer vur de muziek. Ansluutend an de mis ut verhaal van Vorst Jop, en wiere de medailles uitgereikt an Will en meneer pastoer.

Metiën dornao, ien plats van vlaai te ète ien d'n Terp, gelijk dur naor de Liende vur de urste Edisie van ut Expedisie Mökkebal. Reje van de vroege anvang is dat meense direct vanuut de kerk of de Roetsj, zonder tussestop op de baank, dur kosse fiëste ien ozze Mökkestal, en dan misschien ok ietskes ierder naor bed te kunne gaon. En dit idee liekt aardig geslaagd: Ut was veul drukker en mit de band Tonca was ut ok nog en groët fiëst. De vrollie van de raad han groëte planne, want ze han unne trouwjurk an, en twië ware dokter love. En zellefs bestuurslid Han was ien pak, zien trouwpak welteverstaon.

Halleverwege d'n aovend wier de vastelaovend officieel geopend dur Prins Daan, den naor eige zegge vur ut urst nuchter begos an dizze aovend. Ok het hej dizze aovend vur de urste kier zien eige nummer gezonge: KOM MIT OS FIËSTE. Dit was metiën unne groëte hit, ok al was de tekst nie de mekkelukste.

Dornao wier de winnaar bekend gemakt van Expeditie Mök. Urst de poedelpries, die was vur ut team mit de mèste verstokte Diesel zonder resultaat, en dat ware de Terpmökke. En de ultieme winnaars van dit jaor, ware de vice-kampioene van vurrig jaor: DE FARMHUNTERS. William het efkes moj iederiën toegesproke, en dornao kos ut fiëst gauw verder gaon.

Umdat we vroeg begosse, kos net nao 12 uur ut urste eike geservierd werre an os Prinsepaar, en dit betèkent dat ut fiëst vur dizze aovend derop zaat.

Zondag 15 fibbrewarie:

Poging 2: Klènste mökske. Gelukkig, misschien mede umdat we nou wel vantevurre gebeld han, kwaam ut wel uut. Nao efkes buurte, de medaille umhange, un paar mojje foto's en ut klènste mökske ien d'n tuin zette ginge wej wer snel dur naor d'n optocht. Urst officieel ut prinsepaar en ut jeugdtrio ophale. Iederiën docht misschien dat Prins Daan unne andere trakter geregeld haaj, mar de bend van Jan ziene trakter ware gewoën es fatsoenluk opgepompt, en dat ziet der metiën hiël anders uut.

Dornao d'n optocht, den was ok wer net as andere jaore schitterend, en dit jaor ok mit prachtig wèr. De kammeraøj van de prins han ok unne wage gebouwd, mit un echt werkende hot-tub. Alliën han die jonge der nie an gedocht dat wannier ut water wèrm zat is ge ok op mot halde mit stoke. Den iëne nao d'n andere kwaam zo roëj as un kreeft en volledig uitgekocht uut ut 43 graode wèrme water.

Nao d'n optocht was de priesuitreiking en de opening van de jeugdcarnaval ien de Liende. Jeugdprins Mike, Jeugdvorstin Amber en Jeugdnar Roel hebbe alledrie moj gespeechd, en dornao was ut tied vur en moj fiëst mit DJ Eric en Ruud.

's Aoves nog efkes naor de soos, waar ut toch wel lekker druk was, en waar dit jaor ok nog un liedje was gemakt vur prins Daan. Nao de soos ginge we zoëas altied verder ien den Terp. Toen we d'r door iets mier as iëne gedronke han wier ienèns de microfoon durgegove. Iënmaol bej prins Daan angekomme liet den um nie mer los en wiere wej de rest van den aovend en naacht vermakt dur alles wat hej te vertelle haaj. Ok was d'r nog un duet mit Paul ovver hoe ut vroeger was, en wie d'r naor de WC mos. As ozze prins net zo goed ziene scepter vast haaj gehalde as den microfoon, dan was hej um warschienluk nie zo duk kwiet gewist.

Maondag 16 fibbrevarie

Ut begos mit d'n optocht ien Venroj. Ozze moje John Deere 7250R mit twiëhonderdfieftig PK haaj veul bekiëks, en de mèst gehuurde opmerking was: "Han ze genne gröttere?" Das hiël simpel: Nej! Mar misschien wel hierdur ware wej toch mar moj twedde van onder geworre.

Nao d'n optocht was de jeugdcarnaval, waar ut, warschienluk mede dur de lange optocht ien Rooy, nie zo gek druk was. De uitreiking van de KoekieCup was dan ok eenvoudig, de twië diëlnemers han allebei ien hun categorie gewonne.

Mar rond un uur of 8 veranderde dat. De bus van de Hègelsumse kroegetocht was iets of wat verwaald en ienèns ware d'r mier as 50 man ien de zaal. Efkes "Hegga is de baas gedrèjd", Prins Daan het efkes zien nummer gezonge, efkes op de foto mit zien alle, efkes mit un klène delegatie naor de soos, en dornao probiere iederiën mit de Terp ien te kriege. Ut was kort mar krachtig, mar wel gezellig. Toen de rust was wedergekeerd en de ballonne ien d'n Terp spoorloos verdwene ware, begos ut verhaal mit de microfoon wer, en zoë komde d'r toch achter wat vur en zangtalent we eigeluk hebbe ien Oeldere.

Dinsdag 17 fibbrevarie

De lèste dag begos mit de tradisionele brunch ien d'n Terp, den ok dit jaor wer goed was. Gerrit en Paula kregge hun onderscheiding, en dornao was ut tied um naor de BBZ te gaon. En wederom was dit unne kei goeie middag mit 17 acts, waaronder de familie van de prins, d'n hofschilder van de Spurriemök, Bruul en tante Sil en Now Weej, en ok nog de vrollie van de raad die zen dat zej alles mosse doen en die jonge niks.

Nao de BBZ ware d'r wer brudjes mit Hamburger of knak, en ok was d'r nog efkes jeugdcarnaval, mar den wier rond hallef 7 afgeslote. Ut jeugdtrio moog nog iëne kier baove speeche, en dornao nog iëne kier ien de nek ien unne groëte polonaise. Naoderhand efkes naor d'n Terp, um vervolges mit un delegatie en ut prinsepaar wer terug te gaon naor de Liende vur ut afsluute van de carnaval ien de soos. Toen de mök ien brand stoond en de jeugd hun mutse en mantels af han, was de vastelaovend 2015 vur hun ten einde gekomme.

Terug ien d'n Terp was d'r nog en goei uur tied um te fiëste mit DJ Ruud en DJ Eric, mar toen was toch echt ut moment daar. As urste wiere de stoppende raodsleje bedankt vur hunne jaorelange ienzet vur de veriëning. Vincent en Tom ontvinge de orde van de Spurriemök. Martijn ontving op zien beurt de orde van de bronze Spurriemök. En natuurluk vur Mieke en vur de twië nog nie nader gespecificeerde toekomstige vrollie van de raad enne mojje bos bloeme. Vincent, Tom en Martijn, bedankt!

Anslutend wier ozze prins dur de vorst toegesproke, en vervolleges was ut lèste woord vur de prins. Nie ziene lèste speech as prins, mar wel de lèste van vastelaovend 2015. Vervolleges mit zien alle naor buute um de mök ien brand te zette, en de prins, prinses en de stoppers wiere nog en hëndje gegève. Behallevé Tom, den was d'r alvast iiiiiiieëne an ut drinke ien den Terp.

Uiteraard ging daar ut fiëst nog efkes dur, en ging de microfoon wer rond. En toen ut eigeluk en hiël eind afgeloëpe was, was d'r nog un one-man-show van Paul. Hej deuj, mit un pilske en unne frikandel spesjaal ien de hand ut nummer "Daor het un doif, op de vurroit geschete" van de WC-Experience. Wat den ien plats van de lèste zin "op de vurroit geschete" deuj, zal ik nie zegge, mar wel dat hej daormit un knetterend einde an dizze vastelaovend het gegève.

Dit was ut jaorverslag seizoen 2014-2015.
Bedankt vur ollie aandacht!